

Il Signuradi grischun – cuntrada dal vin

La vallada renana dal Grischun tranter Cuira e Fläsch

■ (anr/gc) La «Terra Grischuna» (5/2015) preschenta il Signuradi grischun sco cuntrada dal vin e da buna qualitat per abitar. La via tras las vignas, u dal vin, entschaiva a Cuira, va da là a Zezras e tras la terra da Heidi fin a Fläsch. (En il stretg senn dal pled è il Signuradi la regiun tranter Malans e Fläsch.) I sa tracta pia da la Vallada renana grischuna cun il pli grond territori da vin. Fertant ch'i dat en las autras branschas savens grondas midadas va i tiers tar la viticultura in pau pli plaun. E tuttina datti adina puspè novas sorts da vin.


Sguards ed aspects

Sut il titel «Ord il Signuradi viador en il mund» vegn la famiglia Kuoni, da Maiavilla, cun gronda erradiazion prest globala purtretada. – Dapi 60 onns datti a Maiavilla era cursas da chavals, sa svilupadas ad in top event internaziunal.

Il commerzi cun il vin flurescha en il Signuradi. Ma da cuminanza na sa preschentan las firmas da vin betg. Er istoricamain è il commerzi da vin adina stà in impurtant factur economic. Il vin da là è dentant da buna qualitat e tscherts manaschis han vendì ora cronicamain tut.

Il Signuradi era pli baud la patria da la «signuria», manegià las famiglias da noblezza e patrizialas che abitavan qua en residenzas e chastels. Tar quellas s'udeva era la famiglia von Salis che ha gì a ses temp cumandants sut crunas estras e pli tard diplomats en servetsch da la confederaziun. Gaudenz von Salis s'auda tar ils novs sin lur chastè Bothmer a Malans.

La regiun dal Signuradi è oz in territori dad abitar, oravant tut per pendularis che van en ils gronds centers dal Grischun e giu Turitg, e na sulet ina aglomeraziun per durmir. Igl è ina regiun cun bleras fatschettas.



Frontispizi dal nov numer da la «Terra Grischuna».

MAD

Purschida zunt variada

La sparta «Gasetta» è in vast caleidoscop – per part er en rumantsch e talian. Uschia intervegnan ins t.a. era da la nova ediziun davart Alois Carigiet, il bab dad «Uorsin» e da la «Historia da Glion/Foppa». Menziunà vegn era il Premi cultural da l'Engiadina Auta a l'artist e multitalent Göri Klainguti, che *Not Vital* vul acquistar il chastè da Tarasp e ch'i dat a Turitg davent da 2016 l'emprima scolina rumantscha ordaifer il Grischun.

In giavisch exprimì adina puspè è da pudair elavurar e preschentar l'ierta fo-

tografica dal Grischun. I dat numerus documents na scuvretgs ed in grond deficit pertutgant la localisaziun. – In bel purtret è publictà davart Domat sco vischnanca moderna e cun tradiziun vivida. Tipic per quest vitg cun 7800 abitants èn las Tumas che spartan e dattan la structura. Il pli impurtant factur economic è la Chemia da Domat.

Quai èn sulet insaquantas indicaziuns davart il ritg cuntegn da la «Terra Grischuna» – la revista per natura, cultura e temp liber en il Grischun.